



Sabtu, 28 Januari 2023

Ogen : 2 Timotius 3:15-17



Ngajari Singena Ate Dibata



Kitik-kitik nari iajari segelah mbelin pagi terbaba-baba. Pengajaren i bas paksa kitik-kitik mereken ngaruh ku bas kebiasaan ngeluh. Erdandanken si e mekatep ikatken maka pendidiken e mulai bas danak-danak nari. Timotius sekalak anak si nguda, janah ibereken tanggung jawab guna ngepkep perpulungen. Tek Paulus maka Timotius ngasup ndahiken dahin si endesken man bana. Kitik-kitik nari enggo iajari kerna Pustaka Si Badia man bana, enggo melala ka pe pengejapen si datken arah kegeluhen kerna erti pustaka e. Erlajar kerna isi pustaka mereken kepentaren si mabai ku keselamatan arah kiniteken man Kristus. Guna si e mulihi ipersingeti Paulus kerna pentingna kai si tersurat bas Pustaka Si Badia e me ngajari kerna si ngena ate Dibata, mandang si lepak, pekena si salah, bage pe pedah-pedah si mabai geluh ku kiniulin. Tuhu kuh kal pengajaren i bas pustaka e. Guna si e arus ngit erlajar. Erlajar e proses segelah banci meteh ras ngantusi isi pelajaren, seh maka si erlajar e jadi kalak si terdidik. Tanggal 28 Januari enda iperingeti wari pentingna pendidiken internasional. Pendidiken e maba perubahren bas cara rukur, pengerana, pendahin ras sidebanna. Pendidiken e ngubah kegeluhen. Erdandanken si e me maka erpala-pala kal kita guna nekolahken anak-anak, tapi sada si la banci ilupaken e me persekolahen kiniteken. Kiniteken asam bas ndalani erbage-bage kecibal geluh seh maka ieteh me si lepak ras si ngena ate Dibata. Sabap pedah-pedah Kata Dibata mereken kegeluhen kap. Kita pe selaku nande arus nggit erlajar ras terus erlajar. La lit kata tamat bas erlajar, terlebih bas erlajar Kata Dibata dengen ngajarkenca man anak-anakta. Anaka-anak si malang man Tuhan ndatken pemeteh ras kepentaren kap, sabap i bas Ia nari me kerinana.